

金城集

范之杰題

金城集

六安高一涵

卷四 三十三年（甲申）稿

甲申元日書感

躊躇無策靖烽烟。一望河山一慘然。開府萍蹤羈北闕。季鷹心事在南天。春回紫塞須三月。人伴黃雲已四年。歌嘯不離沙磧海。時艱安敢計林泉。

南郭寺古柏

秦州古寺有南郭。獨立崖頭俯丘壑。雙雙老柏兄弟行。抵足對眠如相約。收拾溪山歸枕簟。黑甜鄉中避鋒鏑。一臥高山數千年。欹斜自有孫枝託。君不見孔明廟前柏摩空。正直孤高招烈風。幹排風雨空強項。虎倒龍顛影憧憧。何如雙柏自謀工。枕石高臥秦之東。此身永屬羲皇侶。不作雲龍作臥龍。

憶春日江南

少年日月總寬閒。不望春還春自還。舟泛碧溪垂柳外。身行紅雨亂花間。柳眠
柳起泥人醉。花落花開惹鬢斑。塞上春來春亦晚。蒼巖何日變青山。
冰雪消融春水生。玻璃草色綠盈盈。秧針插後畦如繡。茶市歸來火接城。野鳥
飛鳴皆並偶。山花開落不知名。東風也畏邊關冷。吹暖江南再北行。

追記洞庭泛舟

澄湘一道接湖灣。上界誰拋九曲環。舞影婆娑洲畔柳。堆烟浮蕩鏡中山。波平
魚沒紋猶見。風順帆忙櫓自閒。遠水吞天天水碧。衡峯渾在有無間。

野寺即景

寺前幽草比人長。寺後山花撲鼻香。蠅青半牆摩籬篆。碑殘滿地碎文章。芭蕉

葉大連窗碧。蝴蝶衣柔帶繭黃。日月自忙僧自懶。倒拖一杖看斜陽。

追憶江行

雙舳啞啞烟雨濛。短篷開合兩艚公。船過飛鳥翔雲際。水淨遊魚戲鏡中。遠渚蘆花千點白。臨流漁火半江紅。今來瀚海龍沙地。聊把車篷作釣篷。

行役雜詠

聊憑行役了浮生。臨水登山弗計程。氈帳星霜蝴蝶夢。戍樓燈火柝鈴聲。晝過瀚海駝爲舫。夜宿沙場馬作城。莫道儒衣身不稱。藍輿高臥閱蕃兵。

匹馬輕裝款段行。高低隴畝看春耕。出山流水頻回首。入塞狂風故作聲。雁自瑤池波上到。涇川縣月從瀚海岸邊生。連年彳亍天西路。足踢龍沙似玉明。

征塵日日染衣黃。板屋門前解客裝。馬跡重重梯子路。篆烟渺渺炕兒床。爐開

餅愛鍋盔脆。

俗呼大餅曰鍋盔。

風動羹傳玉蜀香。高臥土坯堅比鐵。柔鄉無著住溫鄉。

節物東西異。後先好花歲。結幾回緣。陰晴不定黃梅雨。寒熱無常紫塞天。河似

長蛇蟠隴谷。山如奔馬下秦川。生涯數月藏冰窖。一日春光值萬錢。

斜日騎驢趁客程。逢山不及問山名。峯頭樵唱回聲和。渡口人歸背岸行。飛輓
芻糧新活計。起居復穴舊經營。民間草木皆安命。只有溪流氣未平。

擊壤歌殘四境荒。漢廷賢守想龔黃。石壕吏接新安吏。豐樂鄉成伏莽鄉。齊婦
無心辭虎去。永民寧願捕蛇亡。淵明歸臥文翁老。何日黔黎汙小康。

驛亭星月五更頭。行客眞成夜不收。峯影模糊疑卓筆。霞光燦爛欲燒樓。柳凝
朝露青猶滴。河繞春山翠若流。卻羨農家天獨厚。花香鳥語助鋤耰。

春郊細雨潤如酥。處處林園似畫圖。村外禽聲催布穀。花間鳥語勸提壺。梨開

雪嶺高低白。杏放焉支上下朱。三月農人多在野。山山耕牧笑相呼。

雨後山如出浴身。凝脂洗罷淨無塵。彎環野徑頻迴馬。拂路花枝欲倚人。原上有聲知叱犢。烟中聞語識垂綸。何時得伴羲皇侶。埋首田園作隱淪。

溪迴路轉傍巖隈。一徑紅雲襯綠苔。修樹臨風殊婉孌。流泉避石故紆回。楊花繞袖來還去。野鳥衝嵐合又開。水底看山山更好。蒼烟飛動翠成堆。

嫫姚壘上雁初旋。瀚海蒼茫起暮煙。淺草平沙盤馬地。斜陽荒磧射雕天。客來涼夏瓜爲酒。種播新春石糞田。農田春耕先鋪石子於地。自然後犁之。如用肥料。零落棋枰雲外賞。隴原高

處陌連阡。

西來惟愛鳴沙好。晨夕風光迥不同。塵淨月遊疑蹋水。泉清魚戲若行空。山鋪碎玉添霜白。柳映朝霞市地紅。天馬云遙池又冷。只餘鷗鳥伴禪宮。

漫吟書感

亂世羞爲醉步兵。醺然高臥待承平。身窮幾欲疑詩祟。顏老真難詬鏡明。強項朝官霜後菊。蕭條關塞劫餘枰。勾圓又見櫻桃熟。漢馬何時復兩京。

白首他鄉汗漫遊。寄身天地一浮鷗。屈信已似無名指。飄泊真同不繫舟。鸚鵡能言媚拾慧。鳳鸞棲枳勝幽囚。馮唐老去應知命。漢代嫖姚貴黑頭。

欲試戎衣愧老孱。難將干羽格苗頑。吟哦枉弄生疏筆。登覽愁看破碎山。春意闌珊花寂寂。隴頭幽咽水潺潺。燕雲悵望旌旗久。列陣空餘雁度關。

春風吹草碧。侵門枯坐寒氈一笑溫。水暖河天魚放子。泥融苔徑竹生孫。衰年屯戍營平老。亂世輸將卜式尊。自問不如歸塞雁。干戈滿地任高鶩。

詩律粗疏信手拈。天清雲淡息恬恬。飲冰受命因防熱。斂翅全生願赴炎。學步

邯鄲殊少態。寄懷風月不傷廉。老來心事塵囂外。補貼春光有筆尖。

自笑儒窮宦亦窮。白頭依舊袖餘風。一腔心事浮雲外。半世生涯亂角中。鍛向
爐前慵躍冶。聲傳爨下臘焦桐。萬花開落隨天意。桃李何須怨化工。

孤燈無燄欲三更。人靜宵深夜氣平。何去何從天莫問。宜醒宜醉卜難明。一春
惱亂聽蛙吹。萬里伶俜事筆耕。正是夢回無覓處。月華如水送河聲。

雙丸跳盪疾於彈。炊熟黃梁枕未安。烽火驚心同夢易。詩書拄腹折腰難。歸山
有願雖何在。更事無多興已闌。三月春風猶料峭。飛沙鬩日逼人寒。

書騰

書騰人世總堪哀。夢醒南柯見穴槐。仙藥豈離閒草木。神山空有幻樓臺。升沈
日月皆螢火。今古乾坤幾劫灰。莫道西天眞上界。坐床活佛亦凡胎。

西藏班禪轉
生於青海循

化縣現年七歲甲申上元節
在塔兒寺舉行坐床典禮

二月十八日美海空軍進攻土魯克島

土魯克乃加羅林羣島之一。爲日本在太平洋中堅強之海軍基地。
島中大部爲玄武岩及珊瑚構成。每半年有自東及東北吹來之賀
易風。日艦藏匿其中者計有二十五艘云。

海上旌旗射日紅。穴中螻蟻運將終。千窠篙透珊瑚島。五兩帆乘貿易風。雌伏
舳艫魚在釜。高飛鵝鵝翼翻空。斬開鐵鎖降旛出。破竹初收第一功。

寄慰友人

三杯難換終身醉。一蕊原無百日紅。涇水長流仍帶濁。海波自湧不關風。交深
有手翻雲雨。貌美何須賂畫工。參透人情心自爽。升沈榮悴兩空空。

春雷

三月郊原草欲生。輕雷隱隱忽飛聲。竹籬陰重猶殘雪。楊柳絲微未見鶯。有限春心防雨碎。無多花膽怕風驚。吹開吹落隨天意。底事旬稜氣不平。

春來

料峭東風試剪裁。裁紅剪碧繡春來。穿泥蘆筍參差出。冒雨梨花俯仰開。河漲不浮青雀舫。塞寒猶戀白龍堆。江南水暖初肥鰕。鴨綠新波正醖醅。

春日即事

養花節氣轉新晴。小飲醺醺滯慮清。淺黛點鬢山有態。回紋織錦多水情。溫書忽憶兒時味。披牘常聞地底聲。盎盎春風天宇闊。人無城府覺心平。

畫樓記事

畫樓西掛一鉤纖。池上初眠比翼鶼。未免有情人待月。似曾相識燕窺簾。春宵寂寂花如睡。燭影搖搖夢亦甜。晨起閒調鸚鵡粒。忽看欄藥吐紅尖。

寄安西友人

無家王粲欲何之。漫向他鄉泣路歧。輞水雲烟千載畫。灞橋風雪一天詩。但求秦火留遺籍。休怨長安似弈棋。蓮嶽撐空仙掌在。黃流終古有清時。

河行

滾滾黃波日夜流。半乘車騎半乘舟。皮囊作筏浮韻背。塵土隨風沒馬頭。沙細襯蹄聞怒語。月斜轉舵近回眸。亂山爲我遮愁眼。一髮江南望不休。

論詩

故步自封終故我。望塵學步喪真吾。宜今宜古原非易。同面同心自昔無。風月

一天詩境界。雕鏤滿紙匠工夫。文章最忌隨人後。學杜涪翁未是愚。

伊涼道中所見

祁連東下走長蛇。疏勒西流入塞沙。坎井水行翻就上。雲杉枝冷每低斜。磧埋古邑州沈陸。漠過征輪海汎車。屢氣彌漫成陸市。空中倒掛幾千家。

寄撫五嘉定

平羌江月朗千秋。高照峨嵋雪滿頭。山水清音方響洞。風流勝跡荔枝樓。憑欄歌嘯誰賓主。載酒登臨傲郡侯。小駐文翁勸教授。如君真不負嘉州。

甲申三月二十一日興隆山祭成陵時山中積雪盈尺恍似嚴冬

皋蘭山下杏花紅。成帝陵前雪映空。銀襯不遮寒骨冷。朔風猶擁大王雄。幹難玉帳埋荒土。欽察銅駝泣故宮。壯志初酬人已逝。遺言珍重囑和衷。

遺詔有興土
衆民萬衆一

心之
話

雪中過大盤山

四月枯林草未生。花開頃刻送行程。
峯腴山失清癯貌。車過途聞雜佩聲。
古屋昏昏成帝寢。寒雲漠漠宋家營。
三關口外桃千樹。一片紅霞照晚晴。

平涼阻雨

滿地泥深沒馬蹄。齊天雲霧壓山低。
沙流路見嶙峋骨。水汎途成斷續溪。
茅店燈繁蝴蝶夢。河橋風雨鷓鴣啼。
虺隤行役無時已。楊柳何心綠上隄。

和煦園平涼阻雨喜晴原韻

天上霞光滿。人間慶晚晴。
雨收青嶂出。風送白雲輕。
桃李迎春笑。榆楊夾道生。

長途塵土淨。款段過開城。

開城爲元豐開城府故址
在臨原境內道最難行

平涼柳湖追懷左文襄公

柳湖書院爲左文襄宗棠讀書課士處。所書書院匾額猶懸門首篆。
刻暖泉二字存園內。書院今改作平涼師範學校。

平涼城北水生珠。一線涓涓注柳湖。薤葉披離丞相篆。渚芽深淺暖泉蒲。崆峒
劍氣干雲日。韓范威名懾塞胡。桃李滿園初破蕊。絃歌聲裏鳥相呼。

平涼贈范漢傑總司令

自是胸中富甲兵。登車攬轡望澄清。輕裘儒雅敦詩將。畫戟森嚴細柳營。朔漠
胡兒呼老子。隴原黎庶倚長城。崆峒劍氣干霄上。早把旄頭一掃平。

固原

三邊雄鎮固原城。多少營名作地名。萬姓有村皆築堡。四郊無險不屯兵。河山

百戰咽喉道。驛路終年鼓角聲。惆悵豆萁燃益急。蕭關北望更心驚。

甯夏道中

荒原春色故遲遲。春盡官楊未掛絲。忽見牆頭紅杏開。累人纔捲立多時。

同心城

黃雲漠漠雨冥冥。百里郊原不見青。一望垂楊排道立。行人相告近中甯。

中甯縣

兩行青眼笑相迎。盡日垂楊道上行。客路渾忘于役苦。纖烟穿綫學流鶯。

金積縣

塵土黏天思障日。暴風如虎欲馮河。青銅峽水冲融下。一片黃雲暗碧波。

青銅峽

張公祠院梨千樹。搖曳瓊枝弄晚風。香火一龕遺像冷。惟餘鐵馬響丁東。

吳忠堡張公祠

公祠

輕薄東風妬物華。忍將梨蕊委塵沙。紅衫掩面誰家女。俯首無言拾墮花。

同前

任春渡口匯深潭。野艇橫斜客兩三。漁子維舟楊柳岸。依稀風景認江南。

任春渡

洗盡黃雲雨乍晴。賀蘭當戶雪峯明。金波朗照銀川水。玉塞天開不夜城。銀川夜月

半畝方塘水倒流。松風瑟瑟似深秋。清和四月春初到。一樹丁香護佛樓。定遠營達王府

花圖

賀蘭山外古沙場。衰草叢叢市地黃。行過山邊一柯樹。地名桃花紅雜野丁香。北寺

寧夏東教場大閱

貔貅十萬集邊營。九塞春風卷旆旌。令下賀蘭山嶽動。威張銀水浪濤平。驕驍神駿飛如電。干莫瀏漓聽有聲。悵望中原烽火急。願憑鐵血捍長城。

華亭道中

汭水東流過峽門。朝那秦漢舊乾坤。兩儀山口崖中斷。神禹猶留斧鑿痕。

四山環拱儀州郡。一路山花帶雨香。自古西戎爭戰地。威張九塞想隋唐。華亭縣名始於

唐 陌

華亭安口窰

陶神廟祀盛香烟。古樸窰頭尙宛然。搏埴猶傳虞氏法。寢興舜日四千年。

涇川羅漢洞聞杜鵑

蘭州無杜鵑不聞此聲已四年矣

憶從湘蜀作行雲。月夜關山處處聞。客路忽驚春事晚。那堪花落又逢君。

董志原

高原百里盡平疇。多少居民住九幽。

人民穴居鑿地深及數丈

乳燕弄風頻繞塔。飢鳥逐食每

隨牛。井深汲綆修千尺。麥茂行人出一頭。萬戶炊烟從地起。叢林疏處聳譙樓。

西峯鎮感事

西峯鎮北赤旗揚。董志原頭萬弩張。咫尺鴻溝分楚漢。膏腴腹地作疆場。河山

久戰餘焦土。兄弟何心尙園牆。四野徒聞笳鼓壯。市塵戶戶鎖斜陽。

牡丹

占得人間第一芳。萬般紅紫失低昂。蘭花以外皆臣妾。香國之中有后王。梅詡孤高輸富貴。桃矜穠艷遜端莊。無雙閑閑無雙貌。姚魏聲華冠洛陽。

感春

天西歲歲負芳時。春盡紅稀雪未知。蠟炬搖窗空滴淚。絲簾隔夢不通辭。風摧雨妬雙重劫。蝶化鶻啼一例癡。却幸陰成將結子。莫教藤蔓束柔枝。

鄰園

小窗特地向園開。插棘編籬短短栽。待到月明三五夜。移他花影上窗來。

種花

癸未秋日向友人乞得牡丹兩株。植於官署園內。時高不盈尺。恐著花時。吾已得替而去矣。因口占一絕云。『爲憐柏署過清寒。且向臺前種牡丹。我本無必攀富貴。好花留待後人看。』不意今春竟有花放。喜而有作。

天憐冷暑逼人寒。故遣東風放牡丹。坐待成林真有日。種花猶得及身看。

聞道

聞道成皋路險巖。項劉曾此決雄雌。鷄鳴關任田文度。兒戲車容霸上馳。爭羨陶朱爲富貴。更無南八是男兒。傷心豎子成名地。欲劃鴻溝事已遲。

太室巍巍鎮漢京。九朝都會洛陽城。開張伊闕迴行易。洞達輶輶捷徑平。雲夢烽烟三楚合。穀函風雨二陵驚。千燒萬戰餘焦土。悽絕銅駝泣草聲。

望河樓晚眺

斜陽又射望河樓。樓下黃波日夜流。肅邸殘碑凝碧血。元家古戍剩荒丘。風狂渡口無歸棹。水落灘頭吐亂洲。楚塞秦關烽火急。中原不見使人愁。

讀明史書後

誰將血扇點桃花。箋寫春燈燕子斜。廊廟萬機操閹豎。江淮四鎮化蟲沙。東林門戶空堅壁。西廠冤讎幾蕩家。帥悍兵飢民力竭。中原羣盜亂如麻。

驚聞函谷關棄守

穀瀆古道臥虬龍。函谷天開俯要衝。山峙中流蟠底柱。關橫北戒鎖弘農。青牛白馬今何在。虎口丸泥詎可封。設險不應徒恃險。坐看雞狗度從容。

成敗

杜叟他鄉望中興。黃流何日慶清澄。鬚眉漸失靜襟氣。衣鉢惟傳粥飯僧。地有斯文同腐鼠。野無餘肉飽飢鷹。中原成敗眞孤注。獨立蒼茫自撫膺。

東望

中原烽火隔天涯。東望淮南不見家。鄉信那堪憑雁帛。節旄只合老龍沙。難澆塊壘河池酒。枉念旗槍穀雨茶。皖水隴山千萬里。斗邊何日得回槎。

懷人

日落揚子江。風波不可渡。梵聲動金焦。漁火明瓜步。歎乃下中流。虛無是征路。天末懷佳人。滄江邈煙霧。

人生相離合。動如波上舟。風帆偶一遇。各自東西遊。我棹青海月。君狎滄洲鷗。相思日千里。雲水空悠悠。

鉛槧

梅親鉛槧棄筆鋟。入世方知計略疎。早歲吁咷斜上字。老年寢饋線裝書。文成金石皆音末。筆挾風霜亦緒餘。不爲窮愁誰著作。漫將遷固判龍豬。

己卯秋。長沙大捷。余奉命視察前線。風雨之夕。從衡山乘車至潞口。潞口

以北。鐵路橋梁已先破壞。乃易小舟。經株洲湘潭至長沙。孤舟北上。

覓不見。人舟過湘潭。封鎖綫時。所布水雷猶浮沈符藻間。入長沙市。

居民返者僅千餘人。近長沙戰事。又迫近城郊。而潞口株洲湘潭等

地皆淪爲戰場。追念前遊。歷歷在目。爰賦四章志慨。

六月十六日記

亂後衡陽道。無心問土風。雨添湘竹淚。聲斷楚天鴻。簇簇棕櫚綠。離離擺柳紅。中宵過潞口。戍火伴孤篷。

黯澹株洲市。寒燈夜寂寥。移軍途拆軌。堅壁野添凋。宅破無完舍。川危有斷橋。淒涼風雨岸。落木正蕭蕭。

孤艇繫湘潭。江天共蔚藍。水雷牽荇帶。彈雨落金柑。菰米波漂黑。楓林葉戰酣。祝融高插漢。倒影一峯涵。

長沙兵燹後。入市少人煙。家立燒殘壁。江沉鑿廢船。青燐迷岳麓。白骨塞湘灘。旅館隨峯盡。征車宿露天。

書齋晚坐時忍冬盛開

黃白花爭放。穿簾細細香。柳梢初月澹。蘋末晚風涼。天地雙螭角。乾坤幾戰場。那堪蕭瑟夜。空自夢羲皇。

無能

六十年中幾廢興。亂時有味是無能。逢花不肯搖鞭去。選勝猶思攬轡登。事業
乘除餘白髮。光陰補貼賴青燈。笑他飽飯東坡叟。未老先如退院僧。

河干即目

林樾清無極。幽花何處香。漁村人語靜。瓜架水風涼。荇動知魚戲。槎過見鳥翔。
長河天際落。流出幾滄桑。

憶壽縣八公山

亂後淮南路。天荒草木稀。艱難今日淚。風鶴昔年威。故國家何在他鄉客未歸。
八公山色黯。猶自峙淮淝。

送人之安西

瓜州唐重鎮。西去接龜茲。瀚海三千里。風沙十二時。寒山鑲鐵壁。苦水汲鹽池。

寥廓陽關道。茫茫何所之。

崑圃龍堆外。蒼茫一望收。合黎橫塞出。疏勒入沙流。佛畫榆林古。梅花鐵笛愁。班生勸遠略。原不爲封侯。

夜坐

惘惘無長策。依依對短檠。生涯安澹泊。日夕望承平。月影臨窗靜。河聲到耳清。心花拈一笑。不著世間情。

雨後五泉步月

細雨瀟高林。微風散餘熱。幽泉鳴琤琤。苔徑轉曲折。晚霞斂殘綺。皓月當空潔。緣源入幽閼。壑向厚坤裂。汲泉煎玉茗。清芳沁口舌。不聞鐘磬音。人天兩寂滅。

皋蘭山遠眺

振衣直上三台閣。放眼回看鎖遠橋。星宿河源懸碧落。崆峒劍氣指青霄。嫺姚故壘餘衰草。橈廓荒營任採樵。衡嶽烽煙高燭漢。不堪南望楚雲燒。

登五泉山

黃河如綫落奔雷。河上千峰翠作堆。古木高寒衣薜荔。殘碑低臥枕莓苔。爭天溝柳排空起。過澗藤花隔岸開。龍口鳴泉懸樹杪。在山出谷幾徘徊。

蘭州盛夏

高爽蘭州地。驕陽少鬱蒸。夜捐蘄竹簟。市賤范池冰。蚊弱何須帳。堂虛不畏蠅。天階涼似水。清露透吳綾。

階柳垂陰密。堂深好讀書。閒知清晝永。涼認嫩秋初。將雨心先爽。無風惱自除。敲棋瓜代酒。醉看百花舒。

金城集

卷四 三十三年（甲申）稿

十三

蘭州夏日無荷花作憶荷曲

水國煙鄉裏。無邊長碧荷。暗香原在澹。淨綠不嫌多。露下珠跳玉。風生翠疊波。夜涼人定後。鴛夢穩如何。

九州臺

在蘭州白塔山後俗傳神禹治水時曾登此俯瞰九州

禹迹空山上。蒼茫瞰九州。中原方板蕩。黃水復橫流。淮海誰包貢。湖湘痛缺甌。龍門天險共。東望不勝愁。

清晨五泉閒步

杲杲上初日。出郊迎新曙。喬木含清風。瀼瀼滴朝露。冲霄鶴梳翎。帶聲鴉遷樹。幽泉澄我心。晨鐘澹吾慮。人語響空林。花香不知處。野老啓荆扉。驅羊向山路。相遇無一言。揚鞭入山去。

早起

晨星未落先已醒。夜氣清明養性靈。虛牖初生魚肚白。遠山漸露佛頭青。浮雲身世終如幻。流水光陰總不停。自古聖賢爭頃刻。任他日月似飛螢。

題吳御史柳堂書札卷後

風骨稜稜峻。雲箋字字芳。罷歸途托鉢。老去筆凝霜。古道存肝膽。嚴忠動廟堂。

經過南府宅。仰止薦心香。

今湖州南府街有吳御史住宅

甲申大暑喜雨

時雨塞上來。涼颿起庭樹。雨脚連山椒。簷溜不知數。一雨清煩襟。炎涼異指顧。青山出新浴。紅塵渺當路。蚊蚋斂雷聲。驥尾失蠅附。新湍躍文魴。淺渚蘇涸魴。田家慶有秋。努力輸井賦。

隴上夏日吟

炎方畏夏長。朔方畏夏短。炎方願夏涼。朔方願夏暖。禾黍向陽生。清涼滋生緩。隴阪上上田。引熱敷石卵。田家豈不苦。赤背當火爨。願以斗升汗。易得籜車滿。一雨變深秋。愁雨復愁旱。何時塞上天。能爲左右袒。

自然

鵬鷗飛鳴各有天。鰕蛄寸晷視如年。盆栽馬齒當陽長。簷覆牽牛避日妍。澗樹爭空誰揖讓。蔓藤失附互糾纏。細推物理知人事。是是非非一自然。

聞撫五臥病寄問

秋風客裏憶嘉州。爲禱維摩病早瘳。揮塵昔陪燕市酒。題詩曾上武昌樓。且收人日思鄉淚。好放青春出峽舟。同學少年皆白首。東西南北也應休。

秋夜

氣爽天清快若何。良宵無那雁聲多。愁懷似病難勝酒。秋水如烟不受波。淡淡寒英霜後節。纖纖新月柳梢梭。銀河燦爛繩低玉。東逝黃流日夜過。

讀史九月十八日作

玉體深宵擁淑妃。軍書汾上馬如飛。一圍未了平陽破。人在天池尚未歸。夫差習戰已三年。於越行成共戴天。扶眼子胥應笑問。闔廬遺恨幾時捐。傅粉搔頭濁世郎。蓬萊清淺閱滄桑。小時了了侯公子。垂老惟餘壯悔堂。

甲申中秋送周生彥龍之新疆

投筆班生正少年。追陪都護遠臨邊。周郎名震三分國。漢使槎浮八月天。瀚海穹廬新版籍。瑤池玄圃舊山川。嗟余老去虛持節。聽唱陽關轉黯然。

痛聞瀟湘淪陷

湘灘一水兩分流。千里烽煙阻客舟。斑竹淋漓妃子淚。皇輿敗績楚纍愁。九疑
兵盡雲爲守。八桂林昏燐不收。嶺外晉書從此斷。越裳翡翠更何求。

正是橙黃橘綠時。洞庭萬頃碧琉璃。水濱誰問昭王駕。澤畔空餘屈子祠。荆鎮
雲深天柱沒。衡陽雁斷帛書遲。國殤已逝英靈在。雄鬼依依爲守陴。

秋日河干小飲

亂裏光陰未易過。得銷磨處且銷磨。難分清濁逡巡酒。不露文章煨貼波。菊傲
寒霜開獨晚。雁懷故土去無多。秋風每憶鱸魚膾。欲向長河理釣蓑。

送小魯彥龍之任新疆

漢家天子重開疆。星使浮槎汎斗旁。宛馬離宮嘶苜蓿。蒲桃名郡換伊涼。迢迢

葱嶺絲綢路。或或渠壑黍稷鄉。太息輪臺哀詔下。漸聞朝議棄河湟。

萬國衣冠往復還。陽關亭障路三千。沙行繩度烏杆界。身執頭疼赤阪巔。賁奉時輸西極馬。饋遺不吝大農錢。玉門生入班侯老。無復星軺落日邊。

外甥古國肆遐荒。公主悲愁憶故鄉。鄯善會聞遮漢使。于闐不復貢琳琅。迷離石走沙飛境。慘澹風災鬼難方。自昔男兒征戰地。磧埋忠骨野花香。

天山天半雪盈頭。黯澹黃雲入塞浮。熱海炎波煎漢月。伊吾古道阻征輜。見愁汗馬馳瓜郡。空望蒲桃熟火州。西域至今猶虎穴。誰將玉帛化戈矛。

旅雁

我來西極遠投荒。君去南天覓稻梁。同是天涯飄泊客。輸君猶近水雲鄉。遙從塞北望家山。八載烽烟夢裏還。安得隨君南翥去。繁星曉月弔殘關。

憶昔瀟湘九。月。秋。葦。香。菰。米。滿。汀。洲。而。今。迴。雁。峯。頭。月。祇。爲。蘆。花。照。白。頭。
茫。茫。水。國。斷。人。烟。衡。浦。飄。零。只。自。憐。千。里。傳。書。無。遞。處。空。將。離。恨。訴。青。天。

九日漫興

異鄉久客雪盈頭。怕看東南破碎州。杜叟飄蕭羞見菊。楚人搖落正悲秋。蒼梧
竹葉今無分。白帝玄猿亦解愁。惆悵佳辰對羣盜。滿天風雨雁啁啾。

楚漢煙銷戲馬臺。宋公昔日此傳杯。中原豪傑爭亡鹿。南渡江山付劫灰。二謝
有才遭喪亂。諸王無策挽衰頹。登高兄弟今何在。惟願黃花不再開。

一戰何人失馬當。滕王高閣閱滄桑。東南賓主筵終散。松菊林園徑又荒。豈有
漁歌聞左蠡。更無雁陣下衡陽。襟江控楚咽喉地。不見寒英傲晚霜。

荊州西北是龍山。落帽參軍意自閒。問鼎楚王空覬覦。連營蜀主不回還。夷陵

土黑秦灰重。覩首碑殘客淚潛。登覽愁看歌舞地。細腰宮裏雜倭鬟。
望仙臺下晚香凝。四戰中州感廢興。白水金刀雖應議。黃流底柱竟難憑。腥膻
朔漠連三晉。風雨殺函逼二陵。欲向峯頭傾菊酒。亂離太華幾人登。
齊安劫後賸荒丘。杜牧當年載酒遊。烏鵲無枝棲赤壁。江山何處識黃州。英雄
一世空橫槩。鼎足三分痛碎甌。東望小朝廷。路。蕭蕭故壘石城秋。

飲馬長城窟行

長城迢遞低復高。東起榆關西臨洮。風沙獵獵無人境。地絕泉井山不毛。魚鱗
相望五千里。北門重鎖金甌牢。今人城下耕且牧。不識長城何人築。史家但書
秦皇功。誰見秦皇親畚揭。自古衆志易成城。築城秦卒皆編氓。千里裹糧應徵
戍。積雪沒脛塞上行。日看瀚海黃雲色。夜夢爺娘喚子聲。判將白骨換黃土。留

與子孫作場圃。前者已仆後者來。姓名早隨血肉腐。有名無名皆英雄。英雄不與人爭功。何用鑿殘燕然鋪。石揚勒銘傳無窮。嗚呼秦皇按劍一四海。六王甫畢山河改。金人阿房都成塵。惟有長城巍巍終古在。

憶江南

半江紅樹鱸初美。九月黃花蟹正肥。如此江南好時節。年年空羨雁南飛。江南久別憶吳孃。風雨瀟瀟總斷腸。不道陽關聲更苦。樽前怕按小秦王。

秋宵臥病

夜涼如水月侵幃。月自流天雁自飛。一病乍驚來日短。殘年深感故人稀。飄零木葉無生意。慄烈金風寓殺機。亂後還家應悵悵。人民城郭是耶非。

病後中山林閒步偶作

龍尾坡前欲降霜。連林梨柳半紅黃。身同去雁長飄泊。人與秋山並老蒼。海上
冤禽方墮水。竿猴頭戲漸收場。惟餘鸚鵡能言語。猶占閒枝巧弄吭。

立冬日作

紅葉黃花晚更妍。江南好景暮秋天。朔風吹斷江南夢。孤負鱸魚又一年。

痛聞桂林棄守

炎火瀟湘接桂州。邊陲是處任虔劉。雁過庾嶺驚迴翅。雲入蒼梧化作愁。百粵
柑霜皇樹老。九疑竹淚帝墳秋。淒涼南極無冠冕。龍戶謠人亦楚囚。

冥冥氛祲暗南天。百萬蒼生正倒懸。山聳玉參難作障。嶺連海嶠盡防邊。甌殘
象郡無銅柱。人散龍江有瘴煙。越雉文犀消息斷。珠還合浦更何年。

冤鳥

白門東接海門開。清淺蓬瀛夢一回。歸命甘隨孫皓後。降旛先向石頭來。過江敢怨朝廷小。行酒寧忘玉樹哀。桃葉桃根潭水上。迎風翻雨不成材。

一從鐵鎖斷江濱。大代興亡似轉輪。王謝烏衣空有巷。胭脂宮井更無人。生前長樂雖丞相。死後承疇祇貳臣。冤鳥豈忘風浪險。翻因銜石自沉身。

夢遊正江景星寺

病中多夢所夢皆爲昔日經行地醒後各作小詩以紀之

古寺荒江岸。青山綠水田。黃柑垂戶牖。白鳥破溪煙。帆影張三面。鐘聲落九天。秦餘花竹地。鷄犬亦神仙。

夢遊成都贈張八大千

三寸黃柑萬顆珠。玻璃江水釀醍醐。白沙翠竹紅楓樹。千幅徐熙著色圖。雲開山半鳥嚙出。雨過峯頭白鷺飛。應是西川隣佛國。青山都著水田衣。

峽中倒湧詞源水。天上高擎卓筆峯。水吐文章江作字。山川千古蔚文宗。
亂裏頻添杜二愁。浣花溪上幾春秋。何時攜手東遊去。萬里橋邊下峽舟。
夜夢收京返棹時。舟泊牛渚。青天映水。白露橫江。髣髴中秋佳節也。

聞道天兵下石頭。舟回牛渚正中秋。磯頭一戰胡兒去。明月清風太白樓。
餘霞散綺碧天清。如青澄江到眼明。六代興亡渾泡影。青山終屬謝宣城。

夢尋無定河

壯士頻年轉戰多。天南地北日揮戈。閩中有夢無尋處。處處皆爲無定河。

夢過江津懷仲甫

聞笛山陽鶴唳空。墓門寂寂落花風。羊曇怕過西州路。零落山丘恨未窮。

夢遊荊州

歌舞章華久寂寥。虎行人路雨蕭蕭。枯楊那管興亡事。猶趁寒風鬥細腰。
又見秦兵駐綠蘿。元宵無復采茶歌。荷燈不照夷陵路。城郭秦灰特地多。

夢遊桃源

千樹桃花映碧流。紅鵲白鷺滿青丘。分明一幅黃筌畫。誰放空山夜不收。

夢至故友舊居時玉蘭盛放

春風淡蕩柳枝斜。三十年前故友家。門巷亦稀猶昔日。只添一樹女郎花。

夢從軍

魂夢從軍計亦良。優游衝瘴入蠻鄉。家人莫問金錢卜。卜到歸期更斷腸。

新聲

一曲新聲萬馬奔。祿兒反手倒乾坤。唐家合有中興日。未許霓裳入劍門。

蜀道難

李白曾誇蜀道難。崔嵬劍閣出雲端。陰平也是蠶叢路。鄧艾氈苞走疾丸。

臥病

一官螻屈莫能伸。何福今朝抱采薪。因病偷閒緣謝客。延醫勿藥不妨身。午窗晝寢無人議。孤枕低吟免婦瞋。安得華胥千日臥。醒來重作太平民。

回憶湘遊慨然有作

岳陽樓下望君山。渺渺烟波葉葉帆。欲弔湘娥臨水立。不知風露溼輕衫。途穿阡陌稻花香。斑竹青青橘未黃。衡嶽雲開峯頂出。淡烟疎雨過瀟湘。岳麓山高迴雁低。雲間七十二峯迷。南天柱石傾頽盡。付與胡兒櫬馬蹄。屈子忠魂不可招。忍看三戶盡藏逃。汨羅江上無情水。也效靈胥起怒濤。

病中蒙右公賜書賜米賦謝

病裏維摩百事疏。藥鑪經卷日相於。晉人脚氣雖微疾。博得山陰問慰書。
寸薪如桂米如珠。折斷腰肢儋石無。今日罷揮求米帖。也教方朔傲侏儒。

舟行

泛泛蜻蛉小。茫茫水路遙。風生帆得勢。川闊櫓伸腰。打槳搖波月。眠檣過板橋。
迎流灘攔淺。沙怒語聲嬌。

館娃宮

館娃移夜舞聲嬌。胥口狂風起怒潮。宮外濤聲宮內屢。聽來一樣夢魂銷。

讀秦史

詩書之外有詩書。典籍雖亡道不孤。秦火祇燒秦鼎沸。山東豪俊幾文儒。

金人鑄就已無憂。况有精兵壓九州。一事終留遺憾在。未教叱咤廢鉏耰。

蘭州絕句題鴻汀蘭州古今注卷後

中山園圃各西東。肅邸池臺賸百弓。莫道節園天地小。已吞河嶽在胸中。
蔬香館內菜畦荒。水榭空餘半畝塘。寂寞筵翁園畔路。槎枒衰柳立斜陽。
邸鑄閣帖最聲名。七載鉤摩字字精。也是蘭亭千百刻。獨推定武重連城。
擴廓旌旗出塞行。鳳林關外暫屯兵。淒涼末世奇男子。隔代猶傳保保營。
蓮花池上水源枯。五里方塘半野蒲。畫舫不來鶯欲散。嘉名猶喚小西湖。
新年社火陣堂堂。鑼隊高蹀雜劇妝。十八壯夫八面鼓。翻空騰擊唱伊涼。
船自方方囊自圓。小於舴艋疾於弦。日斜風定人歸後。拾起虛舟荷半肩。
海鮮十月下令城。玉尺銀梭到眼明。山市亦如江市鬧。滿街冰雪賣魚聲。

嘉魚。鴿子。勝河豚。餚斫銀鱗雪滿盆。曾作邑侯珍貢品。每隨臘酒獻公門。
水果城中特地涼。西瓜。瓠子。別紅黃。一經秋雨無人顧。切玉堆盤滿市香。
頻婆鮮果女兒顚。頰粉。霑紅笑靨開。甜比蜜筒鬆比雪。月圓時節上場來。
倒吊垂珠顆顆圓。黃金冬果四時鮮。輭兒似畏冰肌冷。半傍鑪邊半酒邊。

病起雪中望皋蘭龍尾諸山

一病因循臥半冬。重簾遮斷四山谷。朝來雪壓窗前樹。飛出玲瓏四五峯。

寄友人乞故鄉梅花

江南先入舊年春。磬口檀香次第新。雪後北來逢驛使。一枝乞贈隴頭人。

自警

楊震深宵畏四知。驚心昏暮叩門時。人禽關鍵幾希甚。午夜捫心莫自欺。

平川也有興波日。風向常多急轉時。順水順風須著意。前途休悔落帆遲。

題溪山幽居圖

峯巒繞郭水潄洄。古木森森覆釣臺。隱鶴閒眠蜷腿立。靈禽學語上肩來。當階竹筍橫斜出。夾道山花迤邐開。月夕自溫缸面酒。招邀野老共銜盃。

白馬篇送知讖青年從軍

白馬何權奇。玉轡黃金羈。連騎誰家子。彬彬朝禮儀。意氣各縱橫。頭角並歧嶷。悅禮敦詩士。論道講藝師。叱咤生風雲。揚威沙漠垂。馬下草露布。馬上率熊羆。左顧斬樓蘭。右盼繫月支。今者寇已深。事急欲燃眉。投筆赴國難。環甲爭先馳。前拒虎狼秦。回定西南夷。復我九世讎。奠我萬年基。椎牛鼙奏鼓。痛飲黃龍卮。何以報辛勤。繡像買新絲。何以紀功勳。銘勒燕然碑。行矣隴上士。父老望旌旗。

謫降

謫降青蓮亦是仙。爲何惡謫喜昇遷。我今小試紅塵謫。游戲人間六十年。

金城集

大安高一涵

卷五三十四年（乙酉）稿

聞興始曲江淪陷

雙闕東西失堵牆。三楓五渡暗斜陽。摩天梅嶺難爲界。裂地韓瀾已斷航。鳳閣簫韶成往事。羊城歌舞賸荒岡。伏波撼笛南征路。馬革何人裹國殤。

阪上

阪上馳驅薄笨車。黃雲十丈渺愁予。何時曲港迴汀裏。結屋如船傍水居。風波畢竟勝風沙。雪浪銀濤噴作花。若得五湖三畝宅。烟波深處一帆斜。

夢亂後汎舟長江喜而有作

昔年辭別武昌樓。五月梅花鐵笛愁。夜半剪江飛棹去。晴川閣下幾回頭。

金城集

卷五三十四年（乙酉）稿

遙從湖口望彭澤。招手先將五老呼。盡日帆隨江勢轉。憑余橫側看匡廬。
歸帆幸遇馬當風。江漲初高九派通。惆悵彭郎波底沒。小姑依舊立江中。
孤舟晨過射蛟臺。鵝嶼浮沈曉霧開。回首皖公山色好。數峯青峭入杯來。
高塔迎江影不流。飛鳶眠鷺滿汀洲。菱湖菡萏花千頃。正好歸來理釣舟。
參差樓閣大觀亭。亭下潮回沒舊汀。羅刹磯頭停棹望。九華遙送九峯青。
洲田處處委泥沙。漁浦鷗鄉剩幾家。江燕初飛帆影斷。野棠臨水亂開花。

贈禹生

烏臺鷗鷺愧聯翩。十九人中齒最先。離亂少陵詩是史。佯狂太白酒稱仙。放言
直欲無千載。辯口驚看動四筵。忍別天台終不返。塵寰遊戲却忘年。

碧血碑

甘肅省城內有明代詩碑二崇禎末流寇陷城王如金氏觸碑而死天陰雨溼猶見血痕斑然

韜碧亭前血尙新。斑斑猩色護貞珉。古今家國無窮恨。都付投繯繫井人。
松柏思陵幾歲春。繫髯仙去惜無人。鬚眉倘似紅顏烈也。省清廷傳貳臣。

書印泉演緬戰場紀事詩卷後

昆明鱗甲漢時多。橫海功勳憶伏波。南下雄師收越賸。西來飛蓋接牂牁。樓船
已復朱鳶路。鐃吹新翻白雉歌。亂日少陵悲故國。將詩作史紀干戈。

王保保城

在臨江府城東北石山古河山嶺有故壘
額然數發即見城郭姑木兒曰氏識

皇覺寺僧仗劍起。手撕袈裟作天子。江東小竊走傳車。鄱陽漁夫中流矢。授鞭
橫渡津沽流。魚兒海畔安歡死。黃屋飛入大朝宮。名家龍虎氣如虹。東南半壁
一囊括。獨於西北無全功。西北奇男王保保。旌旗遮蔽河南道。傾額巨廈一木
支。破碎河山思再造。李羅搆臺內訌生。忽使心膂傷懷抱。劔官削邑那在眼。退

兵澤潞固城堡。鼎鑊甯奪文山氣。波濤不沒田橫島。陸賈招諭久無功。萬里黃龍誰直擣。丹心斗膽眞人豪。橫刀氣與天山高。長河天險難飛渡。直以鳳林作虎牢。元家開國多英哲。道通歐亞車同轍。國運盛衰何須論。碣石殘山幾人傑。保保慷慨孰比數。萬古男兒一南八。皋蘭山色鬱蒼蒼。合剌那海水飛揚。英雄成敗原天命。巾幗鬚眉並堂堂。白塔山下土花碧。遺鏃斷弩交輝光。淒涼隔代條侯辟。賸與樵蘇弔夕陽。

偶作

十載因循負遂初。剛柔到口吐還茹。皂囊彈事存高閣。差喜中無封禪書。高顧黨朋矜氣勢。周房賓客互嫌猜。烏臺軒敞無門戶。自詡清流亦禍胎。

學書

半世生涯傍硯池。欲研八法總無師。三錢獐劣雞毛筆。幾卷模糊鳥篆碑。野鴛但逐兒輩賞。秋蛇每弄子雲姿。遂良鬚髮成霜雪。畫腹濡頭愧已遲。

哀商君

商君信賞必罰。人謂其作法自弊。於是立法者不必執法矣。故作歌哀之。商君之亡也。客舍舍人不內。亦奉法唯謹之流也。因並及之。

九流競煒煌。法家闢不章。儒以文亂社。俠以武爭強。孔孟尊人治。心秤資賢智。徒法不自行。兼尚法外意。商鞅昔治秦。執法理絲棼。日繩貴公子。反以見寡恩。寡恩焉足恥。秦國有倫紀。不恨法如山。但求衡如水。刑不上大夫。立法制庸愚。聖人出庶物。不復作囚徒。論法不論勢。焉得自爲計。惟有守法人。制人亦自制。嗟嗟商於君。作法不顧身。千古奉法者。關中一舍人。

哀霸陵醉尉

霸陵醉尉不知何許人。然以微官而敢呵止李將軍夜行。亦奉法唯謹者。將軍斬之。於是奉法者不奉法矣。因作歌哀之。

射虎將軍掉猿臂。神威懷懷匈奴畏。大黃不發發必中。目中胡兒皆鼠輩。不道
喧。惡飛將軍。霸陵亭下獨解轡。芝蕨微官一小尉。三尺法教萬人避。平時驛騎
擾攘亭。今作紀綱森嚴地。將軍俯首默無言。夜枕寒流不成寐。漢代公卿牽裙
帶。華子人奴皆將帥。胸無點墨氣飛揚。國法多自武夫壞。隴西老將平地起身
手以外無倚賴。何如竹符朝在握。暮報隄隄一快。即今霸上渡水人。銷魂橋
畔猶灑淚。爲恁老將老不侯。更痛醉尉空一醉。

痛聞襄陽淪陷

鐵騎縱橫楚水西。攔街又唱白銅鞮。風流銷歇思儒將。隨畝荒涼剩廢畦。峴首碑前清淚墮。鹿門寺畔遠烟迷。漢家餘業歸豚犬。爭怪山公醉似泥。

聞南陽戰事感賦

赤符受命此重光。譏應真人作帝王。十世炎精興白水。一天雷雨奪陽昆。商於不復爲秦塞。鄴邑而今棄楚防。漢水方城陵谷變。更從何處覓金湯。

讀史

長安天半起朱樓。第宅相傳等置郵。給事人奴曾拜將。平胡猿臂不封侯。馬鑿列鼎鳴鐘食。胃脯連騎衣錦遊。薄技即今堪致富。市中灑削亦貂裘。

六一初度感賦

華年如夢去悠悠。壯日心懷水上漚。偶近名關常斂足。但趨義府不同頭。才情

漸減閒三上。貪妬胥捐募四休。萬事讓人先一著。浮沈身世本虛舟。

革命軍興革命衰。螭螭國是亂如絲。強藩翻覆稱戈日。太學紛紛論政時。水火煎成文字獄。姓名榮附黨人碑。甕壇差喜春風暖。一雨欣看百卉滋。

開國中山墓草新。六朝佳麗地無塵。匆匆告別三千士。碌碌追隨十九人。持祿稀聞言直戇。撫腰空蹙骨嶙峋。東方早被俳優視。譎諫應慚近保身。

無端東海忽揚波。衰髮爭禁患難多。一髮千鈞懸國脈。四方三面動金戈。賈生抗策虛垂淚。杜叟哀時且放歌。八載欲歸歸不得。空令猿鶴笑蹉跎。

刀風吹面刺人寒。破碎河山帶淚看。遺世淵明求醉易。居官武子學愚難。虛糜芻豆慚清議。坐對脂膏忍素餐。禿節誰憐蘇屬國。寸心老去尙如丹。

寒食春郊尙朔風。一天沙雨失空濛。河山憔悴干戈裏。歲月銷磨案牘中。典去

鸛鷺。甯爲酒。滅餘肴。載但餘愁。胡笳吹斷鄉關夢。怕聽江南返塞鴻。

乙酉上巳日作

九分春色日重。三芳草天涯綠已酣。鴈詠風流思內史。鶯花時節憶江南。蘭亭無地供浮白。曲水何心綴淺藍。遙想籠鉤深巷女。胡笳聲裏暗祈蠶。

上巳日贈園主人贈花賦謝

修禊欣逢三日晴。隔牆時聽賣花聲。主人自具移春力。判白批紅着手成。塞上韶光始暮春。重三佳節百花新。公門桃李花千樹。贈我纖纓當麗人。冷官衙署隔東風。上巳鶯花想像中。今日方知春有腳。碧桃花插滿堂紅。

采茶曲乙酉穀雨作

雲霧山間雲霧遮。春風三月貢新茶。市朝爭取頭綱早。不採旗槍採玉芽。

雨前風日自清和。春服初成換綺羅。蜂蝶滿山鶯百轉。杏花風送採茶歌。
絳囊包裹一封斜。馳送長安富貴家。焙馥蒸研辛苦罷。看人活火試新茶。
燈火三更夜不眠。揀茶例得沈郎錢。到京須及清明宴。紗帽籠頭信手煎。
澆舌能將碗礪摧。盧仝七碗悶懷開。誰知嫩綠鮮芳品。都自顛崖墮命來。
玉茗釵頭未足誇。一生專愛六安茶。使君作相知何日。蘇息無能轉自嗟。

純鈎行

若耶溪涸青銅出。鑄成純鈎利無匹。嵌以黃金囊以革。拔鞘光芒耀冰雪。百步
以外發必中。貫甲洞胸如無物。虎氣騰空化爲虹。倚天一吼走雷風。若教落入
隱孃手。白晝殺人都市中。不知何年沈入土。純青如翠鐔不腐。光彩射人更新
鮮。出沒人世幾千年。酒酣高歌持斫地。切玉爲泥如兒戲。若得此劍長隨身。世

間應無不平事。

喜聞國軍連克襄樊

襄陽下後克樊城。萬岷深潭水又清。羊傳祠前鼙鼓壯。鹿門山上賊壕平。槎頭戲浪參差出。楚幘乘潮自在行。新譜銅鞮作饒吹。兒童簞食道旁迎。

謝千齡社贈墨

社中贈我一丸墨。云是黃山雲海之松煙。臭之香作龍麝氣。撫之質如玉石堅。磨之無泡點如漆。色不染手光新鮮。利可削木兼截紙。有鋒在口如刀鋌。嗚呼廷珪不作張遇死。誰復精此雕蟲技。墨官墨師兩無存。搗杵不復煩高士。取材惟取平地松。空令闍然思君子。自從海上估舶來。不尙歛煙尙油煤。歛煙深黑油煤白。黯澹全無香味色。我生惟愛茶與墨。亂後西來求不得。即今世事多倒

顛墨反。研白茶陳黑。今得此墨。日觀摩。愛他兼備才韻德。肅聰偶試硬黃書。滿紙雲煙流光澤。

悼羅斯福總統

萬方多難仗雄才。隻手能將劫運回。天上星辰皆北拱。人間霖雨自東來。黃龍未搗神龍隱。四嶽同尊一嶽顏。盟主云亡王霸在。金山樽俎淚中開。

喜舊金山和平會議開幕

四月二十五日

在把紕糠鑄堯舜難。將得失問雞蟲。域中今是誰天下。謀閉兵銷想大同。龍虎風雲感會初。誓將玉帛易誅鋤。希夷嬾與人間事。一笑掀髯竟墮驢。

四月二十九日傳希特勒及墨索里尼被戮德國投降

納粹城邊水。鰐鱗獨夫霸業此沈淪。半生逐逐緣何事。天下洶洶爲二人。兩路

紅旗揚易北。三年碧血漲來因。到頭未作降王長。孤負劉郎執挺身。

哀墨索里尼

報載墨氏於四月二十八日在摩科湖村中被殺。陳尸米蘭市中。爲羣衆踐蹋。有一婦人向彼發射五槍。云彼有子五人均被謀害。故報以五槍。

飛揚跋扈一窮奇。二十年來幾喪師。死後項王猶裂體。墓中楚子任鞭尸。商君客舍逃身日。鄆隴臍燈照夜時。怨毒中人深入骨。區區棒喝竟何支。

過桂林廖井芝先生宅

鳳林關外步荒墟。來弔柴桑處士廬。偃蹇蘭山當戶牖。逶迤德水繞階除。座餘白社談詩客。案牘丹鉛脫手書。久飲砂泉人亦老。空留遺草斂相如。

金城集

卷五 三十四年（乙酉）稿

千齡社裏憶衡文。強病平章到夜分。倦夢未安遲挂劍。粉榆已失滯歸魂。羊曇
怕過西州路。文起空餘北郭村。循吏儒林應合傳。風流繩武望蘭孫。

烏沙嶺

烏沙嶺上路迴環。獵獵天風愴客顏。盡日人鑽牛角杪。終年雪壓馬牙山。東來
汗血馳驅道。西去星轡出入關。四月農家初播種。峯頭草色有無間。

涼州

姑臧風物近幽燕。地老春渥塞上天。渺渺平沙迷朔漠。皚皚積雪覆鄯連。漢家
旌旆飛揚日。晉代旌裘割據年。苜蓿蓬蓬宛馬去。山川形勝尚依然。

永昌郊望

四月和風習習涼。空濛積翠望雲莊。烏龍河外牛羊壯。柯黑山前湮酪香。羌女

如花蓬霧鬢。蕃情似水入邊牆。沮渠禿髮皆塵土。賸見焉支伴夕陽。

抵山丹次辛巳年晚至山丹原韻

路遠焉支石徑斜。雕楣畫棟幾千家。仙隄草色裙腰合。頭壩渠流燕尾叉。高嶺不遮青海月。征夫惟怨玉門笳。琴湖鹽似佳人面。酒暈微添粉頰霞。

高台印目

古寺崇台閱戰爭。黃雲高壓建康營。北涼故國城何在。西海流沙草不生。一髮黎山邊外沒。餘波弱水地中行。月牙湖畔秧鉞細。欲繡荒原總未成。

酒泉城上遠眺

祁連雄峙肅州城。形勝依然漢代營。滴滴泉滋邊草茂。回回沙洗玉杯明。方圓霜幕參差出。紅黑渠流錯雜行。聞道烏孫消息斷。陽關西去客心驚。

酒泉

一池春酒碧於苔。三過名泉屢舉杯。潘釀漫疑錯著水。鴨頭先見釀新醅。母勞
沾送瓶長滿。不待移封客自來。欲覓娥親無處所。花前把盞幾徘徊。

觀酒泉兵過

官柳飛花送客行。玉門西去不聞驚。烏孫烽火連天暗。瀚海旄頭徹夜明。胡馬
常遮關外路。漢軍猶露雪中營。枕戈待命男兒事。一片檀槽出塞聲。

鄰舍翁

酒泉鄉
中所見

鄰舍老翁夜張弩。深宵捕鼠如捕虎。里人驚從夢裏醒。隔牆呼問無回語。左舍
父老向余言。比歲軍興閭閻苦。從征饋糧人不歸。農村十室九易主。此老四子
三從軍。昨日良田今荒土。朝來里正催獻金。正值孫飢婦無乳。室如磬懸倉如

洗呼兒折屋貨梁。柱忽聞倉底飢鼠號。頓令老翁毛髮豎。昔年紅朽爾不齧。今偏與我爭餘腐。挽弓蹀躞夜不眠。誓將滅此宵行虜。平明里巷炊煙高。不見翁家洗塵釜。盡室相向默無言。窮簷仰屋淚如雨。

張掖道中

處處溝渠處處河。江南風物此間多。荻蘆水淺藏魚鳥。麥稻花香歇駱駝。歲稔不須天作雨。砂流如見海生波。蒼茫廣漠牛羊壯。四野時聞勅勒歌。

晚過定羌廟望焉支山

古廟何時碑定羌。頽垣殘碣向斜陽。蕃庭婦女胭脂庫。漢代嫖姚戰伐場。返照著峯紅似火。流沙映月白於霜。兩山對峙爲屏障。一道中開作走廊。

大漠

金城集

卷五三十四年（乙酉）稿

平沙莽莽渺無邊。寥廓蒼穹面面圓。碎石因風時走地。孤烟如柱直撐天。胡羊三五皆成隊。瀚海高低已變田。牛馬微茫疑點滴。渾渾人在太初前。

河西道中雜詠

行行如到細腰宮。零落桃花滿地紅。疑是息婦春夢醒。無言默默向東風。安南堡見桃花滿地

千里奔雷到耳驚。急披襖襖欲兼程。嶺頭細聽翻成笑。錯把河聲當雨聲。河

清和時節似清明。莊浪河邊草漸生。如掌平原金布地。菜花香裏過紅城。紅城子

古浪河邊雉堞環。風雲猶護漢時關。孤城斗大無平地。一半人家一半山。古浪

大出輕花五月飛。邊風料峭襲人衣。披裘不上嚴陵瀨。來看天山雪打圍。嚴陵山

如花蕃女總心癡。驃騎無家似未知。殺盡風情渾不管。三軍雪夜奪胭脂。焉支山

池漲桃花山映霞。綠楊城郭幾人家。星河一道穿城去。半灌園蔬半灌花。山

楊花如雪糝征途。人祖鬚眉淡欲無。大漠不遮千里目。悠悠白日下平蕪。日升平原

題鵲鵲圖

苦竹嶺頭人未歸。故鄉城郭是邪非。無心羨爾懷南鳥。江北江南故故飛。

題飯牛翁圖

歌罷南山只益愁。後車閉置亦籠頭。高人誰似陶弘景。穩臥華陽但畫牛。

怒號

怒號驚裏眠。杵叟衆妙門前拜老聃。鳬鶴短長誰斷續。斗衡剖折轉渾涵。黃緣任爾三無坐。疎懶容余七不堪。濁酒一盃彈一曲。慵將臧否助清談。

乙酉詩人節千齡社第二次小集追弔屈子分韻得辰字

楚纍去千年。佳節又重午。臨觴忽不樂。遙望瀟湘渚。瀟湘風雨多。歲歲苦軍旅。

金城集

卷五三十四年（乙酉）稿

湘水弔無情。誰投碧筒黍。緬維東周時。兩大惟秦楚。秦軍雖虎狼。亡秦必三戶。
何心子蘭徒。其豆相煎煮。鳳皇已受詒。蘭芷委泥土。蟬翼重千鈞。黃鐘賤瓦釜。
閨闔不可通。叩闥闔者怒。太息望龍門。菀結共誰語。含冤憤懷沙。一沈痛千古。
奇文留南天。蘭蕙滋藝圃。風雅漸寢聲。離騷實底柱。上爲雅頌孫。下作詞賦祖。
皎皎日月光。百世莫與伍。秦寧能亡人。夫人必自侮。綠蘿駐秦兵。夷陵罹秦炬。
雲夢莽烽烟。章華罷歌舞。蘭枯杜亦衰。愁絕涔陽浦。連天洞庭波。招魂知何所。
汨羅千里遙。不獲薦椒糈。楓林黯斜陽。傷心久延佇。

題漁村圖

地偏欲與世相忘。人在蒹葭水一方。沙背夕陽斜照網。鷗鷺晒翅滿魚梁。
茅舍三間傍釣臺。門無車馬不常開。任他陽鱉紛紛至。未許銜鉤入釣來。

月夜獨坐期友人不至

風靜柳梢寧。露下花枝重。人定河聲清。星疎天宇空。披衣把道書。對月時一誦。之子期不來。孤琴誰與弄。

曉起河干閒步

朝日照雁灘。清輝明水木。夾岸麥苗肥。一雨添新綠。逕幽少行人。信步途轉谷。狂風天際來。怒濤起河曲。

題菴僧圖

明臨濟禪師家大燕辛
處西此畫其成

王舍城邊幘。怡禪閣梨也。以食爲天。打包託鉢原非計。且製袈裟學水田。栽田博飯意閒舒。林下經翻貝葉書。夜半鐘魚聲靜後。周妻何肉累奚如。

題畫

金城集

卷五三十四年（乙酉）稿

一

花明柳媚不遮山。水自縈紆鳥自閒。路轉忽聞人笑語。數椽茅屋白雲間。

乙酉五月十六日祭成陵歸後作

五載居皋蘭。十與成陵祭。腰脚昔頑健。履山如平地。踢開攀林行。恨不生兩翅。身在此山中。神飛彼山外。心中小天地。目中無泰岱。健步登懸崖。那憶垂堂戒。一病感身衰。精神先頹敝。舉首望前途。中心懷懷畏。未行先摸壁。頓現女兒態。五步一遲回。十步一停滯。後行人已前。前行渺雲際。今昔曾幾時。衰健如隔世。寄語遊山人。及時早爲計。

河清

入夏冰雪消。河水湛寒綠。隱隱倒青山。沈沈流碧玉。一鳥向天飛。清影落九曲。

月下

涼月無聲悄上樓。金波穆穆柳梢頭。一簾花影風吹亂。散作濃雲滿地流。

晨遊五泉山

西園下殘月。東岡挂新旭。棲鳥猶在林。晨鐘斷還續。清泉流山翠。泠泠碧於玉。何當攜壺來。取作盃中醕。

階前小立

列陣方看階闕蟻。繞枝又見雀爭巢。乾坤到處皆蝸角。寧獨人間劫未銷。

題畫

鳳州三絕手。酒柳柳中三絕眼。眉腰金絲踰地無人惜。只愛紛紛說灞橋。鳳州柳
牽枝附木上青霄。惹得人憐有細腰。畢世不知匏繫苦。年年依樣任人描。蒲

憶西川

金城集

卷五三十四年（乙酉）稿

一二

五年不踐西川土。夢裏三刀想益州。巴字江邊山木合。青衣水上夜猿愁。井蛙

已誤公孫業。鼎足寧銷漢相憂。玉壘天回停戰伐。南京勝地許重遊。唐至德二載
改成都府號

曰南
京

夢遊廣州

無復龍舟隊隊過。蠻人不唱木魚歌。淒涼魚藻門前路。空見斜陽逐逝波。

浴日亭邊里巷空。呼鸞道外瘴雲蒙。木樨花照春波赤。輝映三山劫火紅。

昔年宮裏學飛鴉。今日風鬟舞亂麻。阿閣三重宵暗鎖。沙園閒却素馨花。

歌舞岡前歌舞殘。斜暉猶戀荔枝灣。劉郎喜作降王長。侍酒歡陪執挺班。

頻年

頻年塞上蹋層冰。久臥沙場胆氣增。龍碛草平思躍馬。烏號風勁欲呼鷹。尋源

便擬浮槎去。乘勝猶堪拔幟登。誰料蘇卿逢盛世。居延海畔滯行勝。

韻潮抄示與紹興陳頌洛唱和詩即次原韻簡頌洛天水

閉門覓句陳無已。度隴閒居尙越吟。鏡水稽山牽客夢。塞雲關月觸鄉心。蘭亭集爲干戈阻。文字交從肺腑深。何日剡溪風雪夜。扁舟乘興一相尋。

觀祈雨

片片洮雲透日黃。悠悠高處幻霞裳。出山寧爲閒舒卷。但解因風作勢忙。

長河歸壑不霑山。浩浩惟旋九曲環。爲雨爲霖俱不願。只添波浪到人間。

金花仙子女兒身。玉露明珠淨絕塵。不道荒唐逢楚客。枉將雲雨事難人。傳左文襄公向

花娘娘子雨有驗至今月遇旱
猶爾其類入市司之乞雨

樓頭山雨欲來時。風伯常先助雨師。誰料風雲乖際會。竟施縲綬到封姨。此間習
慣月求

金城集

卷五三十四年（乙酉）稿

一三

雨時必以柳
鎖風神之類

壽烈武將軍

五溪丘壑任棲遲。臨水登山遠不辭。三峽樓臺供嘯傲。八公風鶴助旌旗。耆英
圖畫鬚眉古。淮海威名草木知。待搗黃龍歸痛飲。壽春城下祝期頤。

聽松圖爲韻潮作

滿堂動色嘆神奇。寫出聽松覓句姿。琴韻清幽風謖謖。分明一幅有聲詩。

聞冷厂河北澹園落成寄賀

歷落嶽崎不著愁。梨花樹下結茅幽。門迎九曲黃河水。人臥三間白板樓。元振
建功緣任俠。林宗瑩角自風流。夢中濠濮禽魚樂。淮海何時返棹遊。

池上

一池清水翠於蘋。活碧玻璃萬頃新。滿擬照來雙鬢綠。誰知依舊白頭人。

塞上吟

悔著儒衣塞上行。不曾縛袴學長征。書生用武無多地。且上詩壇按酒兵。
墳典真堪葬火坑。幾曾麟閣畫儒生。封侯有相須投筆。兩石強弓一旅兵。
樗蒲百萬盡豪英。何用文書記姓名。自古爭王圖霸客。大都書劍兩無成。

祝寧夏鹽池縣劉前縣長母壽

蒲鞭懸壁政刑寬。子舍親承菽水歡。封鮓應知慈母意。鹽池司馬是魚官。

寄遜軒

鶴林有高士。掩關事禪悅。秋菊傲東籬。卓然霜下傑。世事鯁在喉。欲吐還結舌。
蘼葭又蒼蒼。何以解鬱結。烏府車馬稀。日望故人轍。池閣生清涼。無虞炙手熱。

暮歸

暮靄蒼茫合。遙峯隱翠鬟。馬辭芳草地。鳥下夕陽山。田父當門飯。禪扉帶霧關。平林眉月淡。細細向人彎。

小西湖遊眺

宛在亭前望。叢蘆茁劍芽。淺池堪浴鶴。疏柳不藏鴉。山杳黃河曲。風偎燕子斜。臨淵思結網。何日足魚鰕。

題畫馬

戲拈秃筆掃花驄。曹霸丹青百代宗。不畫金羈惟畫骨。洗空凡馬出真龍。

塞上

何處吹蘆管。撩人盡望鄉。一舉頭天作幕。視夜月如霜。田種黃沙磧。關依白骨場。

狂風掀瀚海。幻出幾滄桑。

雨後過田家小飲

廉纖細雨潤如酥。姪姪花枝覆半途。烟樹微茫昏壁畫。水雲飛動輞川圖。園蔬小摘皆新味。缸面初開不用沽。飲罷汲泉煎玉茗。自吹松火自當爐。

老至

壯齡不屑憂生計。老至飄零轉黯然。閒把漁洋詩過日。淺斟徽郡酒爲年。愁心每逐清秋發。歸思頻居旅雁前。淮上青山三畝在。何時植杖自芸田。

叠聞廣西捷報喜而有作

雞陵金鼓震南天。夜奪崑崙月正圓。親見萬方頻送喜。樓船十道下朱鸛。飛鳶貼貼落溪多。艱苦南征想伏波。洗盡瘴雲淫潦後。再標銅柱界山河。

入桂林中一戰酣。不教眞臘并扶南。蒼梧風捲愁雲去。依舊山排碧玉簪。
殊方土物貢天家。桂蠹文犀載滿車。海上貨通師子國。漢宮重覩日南花。

和梅川居士七十漫述

神州痛陸沈。天厯遘陽九。南陽雲中龍。不獲臥龍畝。起率湯武師。小試回天手。
既驅竊國胡。復誅獨夫紂。漢轍搖青天。義師光九有。蝸蟪國是焚。黃鐘賤瓦缶。
霖雨阻東山。臥種先生柳。時危仗老成。德失資法守。彌教期明刑。手挽紀綱紐。
喜公絕漠來。星光燦隴首。興盡忽回車。隔山望南斗。何日下峽行。盡滌乾坤垢。
一帆過黃州。退谷揖漫叟。斌媚散花峽。潏洄樊山口。峴潭槎頭鱸。雲夢羔兒酒。
棹歌入梅川。奉觴爲公壽。

勝利凱歌

八月十日作

連朝勝利逼人來。海上降幡取次開。日昃剛陪雞尾酒。黃昏獻捷又傳盃。是日中蘇

化會開
雞尾酒會

無端技癢學吞刀。十四年前夜度遼。利刃橫胸生受苦。縱教切腹也難消。
黃犢初生氣未降。珍珠港內戟先撞。投桃贈李尋常事。相報爭禁彈一雙。
蓬萊山水生波。崖石衝成彈子窩。畢竟三山天地小。丸泥封徧碎關河。
夜郎之技等黔驢。帷幄田中計已疏。到底天驕空自大。難禁一紙嚇蠻書。
屢氣樓臺似有無。一囊飽死笑侏儒。方思困獸猶能鬪。豈料長鯨竟伏誅。
更於何處待神風。劫火先燒半島紅。霹靂當頭春夢醒。牽羊肉袒霸圖空。
千年一系屋猶黃。土偶登臺作戲忙。莫道此君無用。所留他降酒長行王。
元祖東征事未成。受降城郭待經營。朔方三戍黃河外。海上應添第四城。

唐家新調譜伊涼。爲紀開邊漢武皇。從此共和新樂府。又添鐃吹破扶桑。
贈受降特使徐永昌將軍

十道樓船壓海疆。撫綏日出旂降王。漢家龍節雲霄上。遙見靈槎著日傍。
四國同揮反日戈。扶桑濯足踢鼉鼉。鐃歌鼓吹魚龍舞。一碧浮天海不波。

龍沙

十日邊關九日晴。龍沙如雪照天清。風來挾作浮雲去。飛上長安蔽日明。

題劍閣圖

山木青青欲雨時。劍峯字水繫人思。蜀中自有金牛險。笑爾東方牧犢兒。

癸未仲春重遊敦煌訪張八大千於莫高窟盤桓數日夜中縱談名勝忽
憶及滇池之遊乃展素作圖且談且繪口沫橫飛墨花亂舞於深夜中寫

成此幅囑攜交騰衝張舜臣將軍將軍具畫頓興故鄉之思囑題數語以誌願末因占四絕紀之時三十四年八月同客蘭州

青蛉塞外瘴雲收。萬里昆明許臥遊。八月湖平天宇淨。依然金碧護梁州。
草愛纖腰花愛歌。四時天氣總清和。道通佛國西天近。衣鉢蓮花特地多。
空中池裏兩崔嵬。倒影茶花照水開。湖底看山山更好。蒼烟飛動翠成堆。
水匯金沙下海洋。輕舟容與過螳螂。待君名遂歸休沐。先試安甯第一湯。

潭上步月

松際清光來。照見沙如雪。玉輪沉秋水。天水共澄澈。忽焉風落石。擊碎一潭月。
聞降約簽字喜賦四十韻

海盜投戈後。泱泱唱大風。捷書傳蜀國。卮酒醉鞞筒。奏凱新翻曲。班師早掛弓。

金城集

卷五 三十四年（乙酉）稿

一七

馬關蒲鳳恥。麟閣繪精忠。戰伐頻年困。謳歌此際同。運剛交否極。嶽爲降元戎。
雁蕩山靈秀。羊城駿業崇。堅貞行卓犖。胞與量冲融。駕馭皆英傑。馳驅盡虎熊。
容謀泉湧穴。神武氣凌虹。講信鄰多助。包荒德至公。艱難忘利鈍。辛苦任磨礱。
幸賴金牛險。能教鐵騎窮。陪都依鳥道。半壁保蠶叢。列郡悲焦土。生民歎轉蓬。
豚腸餘悍鷲。號野騰哀鴻。四潰樓船泛。千村大斃空。台兒莊血赤。楚子國烽紅。
虜燧驚秦塞。荆駝泣洛宮。腦肝塗地下。憤怒積胸中。石弩疑星隕。瀛洲陷火攻。
鯨鯢沈碧浪。鵝鷺蔽蒼穹。港塞魚遊釜。庭墾鶴化蟲。連艘遭覆沒。兩彈決雌雄。
弗悔飛颺拙。還誇切腹工。大和魂已斷。武士道無終。上界旄頭落。人間使節通。
靈槎摩日月。降表遞轅幢。扶滅微恩厚。殘魁見度洪。潛從全宥赦。歸順得舂鋒。
元祖非常績。軒轅不世功。再尊天可汗。重整水犀銅。申浦航蕃舶。蘆溝駛漢驄。

澎臺同版籍。遼瀋脫樊籠。樟俎聯歐亞。邦畿奠錦鄧。陵園雲紉縵。將阜柏葱龍。
王霸分成敗。乾坤晉揀豐。中興詩獻頌。銘勒字鑄銅。兵挽銀河洗。勛酬泰礪隆。
歡聲騰甲帳。鼙鼓正鼙鼙。

勝利歌

其一

凱樂紅旗勦四塞。溥海歡呼同一快。兵兇戰危聖所戒。自古窮兵兵必敗。何時
東海窟長鯨。巨鼇昂厲冠山行。吞舟魚潛無底壑。海上屢弄潢池兵。甲午初試
魚龍戲。東亞雄獅正酣睡。遂將殺戮代耕鋤。目中直欲小天地。長白山頭秋風
高。銜枚乘虛夜渡遼。欲剪吳淞半江水。先斷蘆溝十孔橋。狼奔豕突如流電。紫
荆山下陵寢震。席卷中原千百州。萬里橫布長蛇陣。飛鳶跼跼銅柱傾。傳烽燒

徧日南郡。馬來島上馬脫羈。珍珠港內珠探驪。海嶠萬千一囊括。自詡東方無敵師。惟我神州與彼美。國境相望隔一水。仁義爲戈信爲弓。赫然一怒仗劍起。舳艫銜尾橫海來。鵝鶩蔽空日翔迴。游魚在釜鷁退飛。天狗墮地聲如雷。沙蟲猿鶴幾幻化。朱樓白屋成飛灰。我臨西南天半壁。遙望鯨鰐截波赤。手揮六師勦地來。魯陽戈起摧殘敵。腦沙漠兮髓余吾。掃天狼兮震霹靂。坐看方丈海揚塵。笑指三韓興滅國。八年焦土玉石焚。痛定思痛賦策勦。一曲凱歌千白骨。萬甕行酒祭忠魂。九州血補金甌闕。日月所照皆吾軍。昔見遠山朝白帝。今看衆水匯白門。萬人鼓吹蔣山下。五雲依舊護陵園。馬關奇恥一朝雪。永銷劍戟事耕耘。彼善戰者服上刑。從茲四海靖風雲。

校頭雀爭巢。階前蟻列陣。蝸角噉鬚觸。伏尸動盈萬。弱肉強食理自順。豺虎雜將仁義參。三代以來幾紛爭。天下奚定定於戰。武裝之下無和平。和平只是弱者聲。天演淘汰無私情。優勝劣敗如持衡。物敗因靜靜以止。物勝因動動而爭。爭之不已天爲擇。弱者自死優者生。中華立國五千載。居安思危勤無怠。多難興邦憂啓聖。大地河山終不改。涿鹿一戰擒蚩尤。茫茫禹甸定九州。秦皇遠將漠北收。漢武兵指天西頭。唐家三箭天山留。元祖鐵騎徧歐洲。兼弱攻昧固金甌。戰在一時功千秋。書生偷安多厭亂。每見兵起輒三歎。晉宋江上去太半。猶思南渡圖安宴。今我仗劍斬蛟螭。誓將殲此不義師。要令東海絕鯨鯢。殺伐亦如皇天慈。莫以勝利遽荒嬉。雖臨平時猶戰時。天道好還盛復衰。外寧內憂事無疑。華胥有無未可知。文德武功相扶持。安能默默終守雌。弭兵直與虎謀皮。

強持刀俎弱爲犧。臨終束手等燈檠。國事成敗猶奕棋。一著能將全局支。不可勝者乃真勝。好讀武者終必危。五千年來一勝利。戒愼恐懼寧爲癡。今日痛飲黃龍卮。惟願安不忘危念在茲。萬世永保勝利旗。

勝利日千齡社金城燕集分韻得河字

頻年四塞角聲多。此日金城醉凱歌。富士峯高看立馬。大和魂斷競投戈。神山歷劫仙猶死。丹服來朝海不波。徐市靈槎天際去。恍疑博望泛星河。

黃龍府內醉顏酡。醺酒椎牛慶止戈。海嶠參差歸版籍。蓬萊清淺徙龜鼉。三韓帝祚開新運。萬國盟書贊協和。汲盡滄溟供洗甲。漫勞壯士挽天河。

題黃賓虹黃山圖

垂老臨邊思鄉念切黃山之遊久爲烽烟阻隔忽從蘭州得賓老此圖失

一黃山於故國得一黃山於塞上爲之狂喜因占二絕以誌之

亂裏黃山未許遊。遙從隴上夢浮丘。何時得伴滄洲逸。手汲香泉洗客愁。
失喜黃公爲寫生。眼中三十六峯明。悄然坐我天都下。如見羣仙抗手迎。

喜聞國軍收復徐州

亂山合沓繞徐州。城角依然汴泗流。天下洶洶成往事。霸王廳上聳黃樓。
中原豪傑逐秦嬴。楚漢雌雄幾戰爭。戲馬臺前山鬱鬱。空餘落日照彭城。
微子山邊夕照殘。台兒莊上角聲酸。斑斕十萬男兒血。染得楓林樹樹丹。
楚歌四面泣重瞳。愛妾名驂大澤中。子弟八千齊解甲。也應無面見江東。

乙酉九日千齡社集五泉山武侯祠分韻拈得字

九日天氣佳。登高杖輦。策言賞蘭山。秋信步恣所適。掬月漾金波。臺泉燦瓊石。

五泉即惠泉甘露泉掬
月泉摸子泉靈泉是也

躋攀武侯祠。縱目寥天寂。淺深梨林紅。遠近沙阜白。高閣集

佳賓。話舊感今昔。忽聞絃指音。松風動四壁。

安後開舞臣
新令彈琴

恍疑臥龍興。揮手寫胸

臆。戰塵沒東南。故園久蕭滅。雖有傲霜姿。黯澹無顏色。晚節抱晚香。淡中養高
格。幸見銀河清。爲我洗兵革。旅雁正南飛。杳無關塞隔。長歌歸去來。罷作異鄉
客。掃除三徑荒。葺補五畝宅。佳色放東籬。素心共晨夕。搖紅看笑日。帶紫望盈
陌。長吟助躬耕。悠然意自得。

樂都弔南涼王兄弟

碾伯城邊戰壘荒。空餘湟水抱青唐。白眉韜略雄三傑。赤手乾坤冠五涼。部曲
不留仙海岸。居民誰憶武威王。甕中日月殊昏暗。馬上功名馬下亡。

武于亮
髮烏狻

花萼相輝義友于。傳檀機智蓋羣胡。英才豈必生神胄。名將寧皆出聖儒。忍見

家邦歸乞伏。痛憑鳩酒報烏孤。骷髏臺下骷髏泣。百戰聲威墮半途。景王柔
髮傳禮

秋日青海旅次雜吟

樹卷秋聲葉燦霞。書空雁陣字欹斜。秋風也是丹青手。繪出梨園滿樹花。
野外寒花紅寂寞。道旁秋柳綠蕭疎。老來心事悲搖落。況是臙肥雁過初。
醉把茱萸愛晚香。西寧三度遇重陽。明年此日知何處。漫道他鄉即故鄉。
天地蒼茫勑勒秋。風沙獵獵草颼颼。虎台雄峙麒麟岸。徧野牛羊是鄯州。
飛昇羽化事無奇。滄海桑田信有之。蕃寺方傳人轉佛。仙湖又道海生兒。

也俗稱
海兒子

態掌牛心羊肚羹。朝朝席上列山珍。聊將斫鱠持螯手。抓肉搏粳學藏人。
案上新供菊一盆。恰如人意淡無痕。連朝怕冒西風冷。坐對寒英不出門。

金城集

卷五 三十四年（乙酉）稿

二十一

青海
小記

遊軒自迪化飛閣過蘭賦贈

飈車西渡瑤池外。回翅懸鉞復向東。翡翠瓜香嘗嫩綠。硫黃荔熟壁輕紅。虎頭肉食山珍美。馬甲盤登海味豐。德水清溪皆九曲。滄溟星宿一航通。

正論簡冷厂

千秋正論憶歐陽。黨引爲朋道義亡。元祐名儒分蜀洛。甘陵食客誤周房。髡鉗北部風流盡。水火東林士氣傷。美爾墊巾槐阪上。喬松擢漢自徜徉。

臨洮晚望

向晚洮雲片片黃。馬銜高聳鬱青蒼。空聞岳麓臺樓鳳。不見哥舒夜帶槍。地老崖凝三合土。俗廉人住半邊房。椒山正氣雙忠節。

椒山祠下有雙忠祠祀張允溪鄒蘭谷

懷古心添一

瓣香。

臨洮客次呈張致堂前輩

北斗星高徹夜明。長城起處拜耆英。鄉鄰白賀詩逾好。地近夷齊節更清。魯殿靈光天外古。鳳臺桃李雪中榮。兌溪歸隱椒山去。道統祠前百感生。

康樂虎狼關

虎狼關下幾蟲沙。一虎當關萬衆嗟。地已無皮供舐血。山惟有骨任磨牙。峽中川合雙溪水。天外蓮開五瓣花。兄弟鬩牆成往事。壘篴聲裏話桑麻。

河洮紀遊

隴上黃雲欲蔽天。車塵如浪復如烟。此行深得風雲護。吞吐塵沙日幾錢。

城邊恒水洮水一日恒水其聲如雷萬珠圓。峯上蓮花百朶鮮。水走雷音花滿寺。斯遊真到小

西天。俗稱洮陽曰小西天

鳳去臺空曾幾時。碧梧斬絕子孫枝。鎖林峽口煤如故。留作椒山去後思。

矮屋朱門忠諫坊。兌溪恰似米顛狂。廬州解組無長物。書畫船添石一方。

臨川閣下水生珠。堤上垂楊插萬株。仕女驚花春社裏。灘頭指點話西湖。

昔今日西湖只

餘湖灘而已

會川受爵此窮荒。

明正統五年封趙安土司爲會川伯

鐵券頒來檜柏莊。

趙土司後裔今爲會川縣參議會議長鐵券官印猶在

斗大

印章懸肘後。建牙開府小洮陽。

官堡昔稱小洮陽今爲會川縣治

蓮花山下住蕃兒。茲白飛黃未是奇。行過虎牢三汊水。平川蹀躞走胭脂。

胭脂川產

胭脂馬


天方門宦久分疆。華寺紅門又白莊。稍喜穆扶提忽醒。阿訇知上讀書堂。

少年個個美髯髭。黑白平冠老教師。渡過康家崖畔水。野田處處唱花兒。

河州民歌

曰花
兒曲

鐵門坎是鐵門關。多少男兒去不還。十里陂陀紅似染。忠魂猶譚董家山。
自嚴壁壘自爲營。處處村墟處處城。襁褓隨娘乘馬慣。丕娃生小即騎兵。
好是鴻荒太古初。不知不識把犁鋤。掃除文字歸真樸。自備脩金僱讀書。



金城集正誤表

卷	頁	行	錯	誤	改正
一	二	一五	祭		祭
一	三	一二	入		人
一	四	一	闕皇		皇閣
一	四	七	貽		貽
一	五	九	垂		乘
一	五	十	眸		眸
一	五	十一	直		值
一	五	十二	次再		再次

一	八	十三	灣	灣
一	八	八	兔	兔
一	七	十八	小註	渠延
一	七	十四	辟	壁
一	七	七	斷	斷
一	六	十三	厠	厠
一	六	五	遠	沙
一	六	五	崖	涯
一	六	三	一	以
一	五	二十一	沙	洮

一	八	十三	醒	醒
一	九	十	小註 有	者
一	九	十六	富	福
一	十	三	馬立	立馬
一	十	四	養	養
一	十	九	序	予
一	十	十	拾	十
一	十一	五	警	驚
一	十一	十八	邊城	城邊
一	十二	七	吉女	吉好女

一	十二	二十		欄		欄
一	十三	五		塞		塞
一	十三	十一		如快		快如
一	十三	十三	小註	唐		康
一	十四	十一		陂		阪
一	十五	五		霄		霄
二	一	十一		山		天
二	二	十		巢		窠
二	二	十六		濱河		河濱
二	三	十		兩		雨

二	四	六		綿		錦
二	八	十四		州		洲
三	八	十二		款		款
三	十一	七		筋		筋
三	十三	十三		鳥		鳥
四	二	十八		模		模
四	六	九		襯		襯
四	九	十八		貴		賈
四	十	十七		款		款
四	十一	二		罕		犁

五	四	四	四	四	四	四	四	四	四
四	二	二	二	二	二	二	二	二	二
四	十八	十六	十五	十六	十二	五	十二	二	十六
陽昆	菇	辟	是	亦	茶	青	鋪石	一	峯
昆陽	茹	壁	似	依	茶	練	石鋪	三	烽

五	十六	九		降酒長行	行酒長降
五	十八	十八		鼓	鼓
五	十九	七		上	山
五	二十	五		淘淘	淘淘
五	二十一	九		態	熊
五	二十二	九	小註	日	日
五	二十二	十三	小註	昔今日西湖只	昔日西湖今只
五	二十三	四		犁	犁

[illegible]

82
002213
6